

florenorum quingentorum injuste abstulisset et auferri currasset; eadem sua Sacratissima Majestas, juxta benignam superinde factam resolutionem, medio Commissariorum, primo quoque tempore, benigne restitui demandare dignetur.

De executionibus judiciariis in Confiniis non impediendis.

Articulus 48.

Si porro Capitanei, Vice-Capitanei, alique Officiales Confiniarii, aliquas executiones judiciarias in Confiniis et alibi non admitterent; vel quovis modo impedirent;

§. 1. Decretum est: Ut tales Executiones ex bonis ipsius Capitanei; immobilibus, vel mobilibus, abscissis omnibus juridicis remediis, fieri possint.

§. 2. Quas si ipsi Officiales Confiniorum turbare praesumerent; poenam in Articulis expressam incurrant.

§. 3. Si autem legitimas testium inquisitiones, authentice institutas, contra Art. 67. Anni 1618. quotiescunque non admitterent; toties in centum florenis Ungaricis convincantur.

§. 4. Atque Statutum istud extendatur etiam ad Regna Slavoniae et Croatiae. *)

De Liberis Regisque Civitatibus et Oppidis privilegiatis, in libertatibus conservandis. Item de Oppidis Sancti Georgii et Bazin.

Articulus 53.

§. 1. Ita etiam in Slavonia: Ubi ne Capitanei et Praefecti Confiniorum, in bona et jurisdictionem Dominorum terrestrium et Liberarum Civitatum, ejusdem Regni Slavoniae, sub amissione officiorum, sese intromittant; conclusum est. **)

Commissarii ad revisionem metarum circa Styriam.

Articulus 58.

Circa Styriam et Carnioliam; Reverendis. Dom. Benedictum Vinkovich, Episcopum Quinque-Ecclesiensem; Spectabiles ac Magnificos, Comitem Christophorum Bánffy et Casparem Konzsky: Egregios item, Magistrum Petrum Znika, Regni Slavoniae Protonotarium, Gabrielem Chernkoczy, Joannem Ruchich et Petrum Spolarich.

§. 1. Loco autem illorum, quos medio tempore abesse vel mori contingeret; sua Majestas, vel Dominus Comes Regni Palatinus; in Slavonia autem Dominus Banus, alios idoneos eligat: Et literas Adjudicatorias, quae hactenus in talibus differentiis confectae essent; sua Majestas per eosdem Dominos Commissarios Executioni demandare dignetur.

*) Renovatur; An. 1647. a. 59.

**) Renovatur; An. 1638. a. 19. et 35.